

509030

平定兩金川方畧

六

十  
七  
九  
十  
一  
二



平定兩金川賦

戶部左侍郎臣梁國治

乾隆四十一年平定兩金川

皇帝乃洪大誥治敷宣

睿意勒功太學鑱石美諾曰勒烏圍曰噶拉依大文

豐碑於鑠咸熙相臣將臣錄敘不遺等功核實

親序贊之粵稽姚姒爰考子姬武功之赫文德之禋

疇運籌於獨斷疇美備其若斯往者乙亥之歲

天以準部衛拉特二萬餘里肇啓我疆伊犁既定回部

底平土爾扈特歸順賓庭戢干偃伯黃祗砥寧

下湔塤黷上答

乾靈于是天弧直狼璇霄燭晶有睽睨而駮伏孰睢盱

而敢嬰乃有兩金川者僭拉種遺促浸蘖生魚

蠶牙錯小大區名巢居軋芴礪卡縱橫鬱餘氛

之疹戾闕複奧而蘊蒸將聚殲乎斯族乃控搏  
而胚形歲在戊辰郎卞始貳宓厲厥牙澤盱乃  
繫冉愕駭駉邛霾笮暄於時

命將申討師于是試逾昔嶺而霆驚震雪山以軒輊  
旣倦虬而顛貸

皇慈惻而回霽赦彼窮蹙不殫其類爾乃蠕匿灌楚  
蠓戢峇峇猿狎善閉狂趨思搏甫十年間釁搆



難作憑其醜類肆其狂虐侵我土司擾我區落  
陽釋讐而師婚伏械深乎谿壑索諾木嗣羈羆  
濟惡伊僧格桑嘯侶同攫革布什咱謀殄而盜  
符鄂克什寨合圍而攢鏑母姑內鬩牝晨家索  
窮禱比以潛煽驕力輔以傲媿播狂謠於維州  
將睨無憂而覲井絡惡積貫盈自取誅縛

皇帝命總師彰九伐韜鈴握機司馬明法棧閣繆繞

爰啓爰發巴朗約咱踉蹌紛撥我師如神迅速  
飄忽獍父孽俘貉子狡脫迹人躡而來告遂因  
驢而誅歷何妖霧之欲歎巧伺隙以鴟張木果  
惜於兵分寒灰燼而復揚當噶屹其難撼殿全  
軍其獨當

申命定西易符專征大器選徒健銳掄精吉林仡仡  
索倫泱泱於彼金川乃剔乃攘翁古爾壘決謀



計詳定西自西威稜霜隼明亮偏師南路窅引

田命 再接再厲前衝後紵西克谷噶始自資哩赤爾

丹思南入馬尼旬日齊捷美諾爰止寇魄悸於

鶴唳士拘怒而虎視若夫了口嗟峩拉窠盤紆

磴磴積雪裔裔冰途豁間裕訝苾虜崎嶇驍師

纒屬靡艱靡虞兵有遲速事有勞逸犄角相倚

別派旁出堂堂中軍所向辟易由羅博瓦而至

色泐普蹴堅其如脆襲喇穆而驀默格爾

抵瑕於不備截榮噶以衡車賊勢分而爲二越

有宜喜鬱然重山集霰蒼葦及亞峯間關千萃萬

夫鳴謹攀援始雖阻於重險以終迅越而無難南

路之師西路是倚裨軍翼公乃如臂使指甲索撒

谷賊逸蠓蟻走不及遁潛不暇纏焚巢毀碣霍

霍繹繹他他藉藉至於五十里繫繼勇之翹奮

秉赴桓之夙譽遜克爾宗爰殲爰除列卒紛前  
拉朽衝堅乘利席勝接脰摩肩維勒圍之重秘  
塹賊壘以捲垣經樓稜撐冷角蠶攢排隙潛竇  
拒救千端雷收聲於地底兮中藏熱而外燔紛  
交躡以爭蹈兮若烈火之燎原颺驚飛炬箭重  
沈船游兵立於洪波橋旣傾而流堙旁徇遠略  
鼓怒無前六十餘所一夕占九焉定西桓桓威名



宣馳大將誠謀羣帥指揮斯雍中荆舍齊直抵  
於噶拉依突擁千甲囂聲流施前翹後拒禽獮  
草薙一鼓並登冰泮瓦解萬計千羣蜷局就械  
捷書飛馳秦疆晉界紅旌迅乎飛檣目一瞬而  
弗逮囂合兮塵涌潮音兮澎湃愉氣升爲慶霄  
鬱葩瑤乎華蓋肇出師於辛壬實武臣之宣力  
嫻軍事而整暇坐甲裳而備飭以秦膚公有嚴

有翼

命將序位各得其職總戎之功蓋臣之績惟

聖主之知人神勸賞於黜陟

睿圖握要妙算前知曦朝日具軍書羽馳宵衣待日  
旰食疇咨地圖扼塞兵形險巖

心營

筆畫聚米成奇若乃臚列鴻捷刻繪銳武義炳日星



聲馳風雨

作詩紀績據事直言理質語實經焉傳焉

皇帝集是駿烈茂茲大猷對揚

祖

宗升薦

陵丘欽若

皇祖寧成適求庶懸禮嶽峩冕導翰却金泥之典陋祛

玉檢之文浮因名山而仰貺精禋穆與

天謀乃徵古義俎太牢學有受成泮有獻囚道演

孔圖合契春秋軼乎百二十國之寶書奚更考於

異郵旣而笳簫厲響旃旆競驚大愷沕穆翕然

煦嫗動容發音耳傾目注軒樂身律王夏式度

崇臺矗天眴不暇顧紅雲燿而下垂

天光燭於遠路方稽名拜

堯容

湯步左律右鉞俘馘爰獻

午門正中淑景昇見八荒偃武四極寧晏讓善尊

親雖雖肅肅遠徼銷兵

璇闈志懌崇號

寧豫肖實象德蓋以保大定功而茲延

天福也然後本



天道發

淵衷洋洋

聖謨鳴謙示冲重華所爲顧省放勳所以允恭憂勤  
義易之奧旨審已麟經之義宗洵乎垂萬世之  
道法揚勳績於無窮者矣夫金川之地險莫殫  
論衢跡左擔砥跡劍門昔者漢置汶山斥堠鄰  
焉唐戍滴博吐蕃堙焉

皇帝鏡機芒織羅絡厓垠剔嵌抉竇五稔集勳周撿  
大文 鄉嬛三古無聞

皇帝勒銘覩日披雲佳兵慎德垂鑒後昆八旗勁旅  
大文 闕虢虎臣師中貞吉厥有丈人承

謨視草協益宣勤

皇帝製贊嘉乃恭賀一字榮旌累葉振振此載筆之  
臣千歌萬頌揚厲鋪陳終捫璣測乾布肘量坤



也臣國治備員

禁近日聆

皇綸珥筆直廬先覩

天文拜手稽首敬獻頌云

胚渾融結黃輿絡分雪山矗峙化均烟燼自我

天覆悉主悉臣隸我

皇圖我土我民孰縉我印而險弗馴郎卡首難吹毒



鼓齟戊辰之歲薄伐用申旣感斯赦復叛辜

恩負其砮阻恃彼礪响孱肉彊食鬥穴侵隣層障隱

日折裂雲根一綫萬盤絳肘胃跟密罅隱蠶曲

磴藏龔磨牙礪距投骨狺狺維九土可盟誓婚

姻不念舊好肆其噬吞伺隙則齧鋌走僦僦有

縶而豢熟灌而熏厥後嬰討二豎疊因蛩駘陸

梁僂僂迷惛刑天銜戚蚩尤播塵

帝乃憑怒雷硠震震維彼美諾蒙翳荒屯僭拉營巢  
負嶠而蹲我師初至炎火烈崑泊乎再收迅激  
風輪五口轉戰已薄其垣六丁所擊裂石留痕  
維勒烏圍萬嶂插天水陸阻塞屹爲重關洪流  
斜界簸浪鎔銀二壘傍狹以籬以藩蝟鋒幢斧  
聚而饒喧棧梯雲磴苔滑莫攀我衝其脅欄楯  
鉤連步步而營蛟龍蜿蜒戴桐囊沙虹橋絙牽



撇波一曳力回萬犍內靡子遺外絕救援地道  
乃熨天塹乃填金天夜晶皓魄正圓列缺忽激  
隆隆闐闐銅丸鐵鍵巨冶鎔煎百樓千櫓摧拉  
飛烟羌奴呼渴鬱攸中燃隱聞號呼羹沸蝸蟬  
遂臨噶依倚尸踞巔絕壁無梯突兀孱顏大軍  
旣合萬重霜鋌雲羅翳霄鐵網絡川蚍蜉蟻子  
一隙莫穿戰士距踴驅縛牲牲厥魁繫頸厥黨

平定回疆方略卷之二十一  
十一  
桎拳母姑兄弟妻孥駢肩妖霧澄霽白日中懸  
鏡吹和平響答萬山其他攻勦戰且累千仄徑  
垂鎖叢途裏羶欲擒而縱若却而前並擣其虛  
飛度危巒自天而下倏扼其咽雲氣漭泱雪霧  
迷漫突其來如拔壘摧堅奇兵九地孰測其端  
千變萬化縷數莫殫飛揚七萃威讐百蠻九姓  
惕息匍匐曲膝正我



王鉄肅我戎旃指南之車實惟

軒轅上將次將匡衛環旋

功大彌謙

冲懷穆淵

凱歌卅章舞詠虞薰容臺撰禮樂師宿縣

橋陵動色享祀精虔因躋介邱升中

大園思樂泮水舍菜朝昕神人之事典義深淳交修並

舉備而不繁國陽顯見妥帖圓壇金鉦擗鼓凱  
奏聲駢靈繡翩翩儀衛閑閑

大駕回鑾景從千官

雙闕飛翔五雲縈蟠

鑾輿登降以臨以觀異聲同贊合氣齊歡圓靈方祇  
一肅一溫陰闔陽開一義一仁文武張弛變化  
迭循當斷必斷赴機若神不需以長不豫以長

應聲舍矢

志定必伸我勞五載圉靖億春江出其腹蜀都枕岷  
種芋織橦同是蜀氓繫豈惟蜀八紘無垠

威稜四懼川嶽效珍畝棲餘糧壘無戰雲金川之功

悉由

聖神惟

帝炳幾惟



帝知人羣策羣力元戎元勳將軍定功

聖主賢臣

皇帝歌詩星文斗辰

微臣

管窺頌聲以陳四海歡洽

來賀來賓

歌聲合天

平定兩金川賦

四庫全書纂修官禮部主事

臣

任大椿

白毛帝仁洽道豐騰華納祐握珍光之淳全馨景烈其

彌茂

神武本乎靖綏鞮譯艘而奔輳榮鏡無外歌前舞後

蓋陸警水慄而奉丕天之大律者咸洞寰而洽  
宙然而豺豕羆豸豨躡以長釘叵鏹而蠢不忘

夫騰蹂也蚰蟻蛾蚌非極之掘埋清壤而膏糞  
爭夫鋤墻也伊促浸之小醜敢犯

命而內抗部駢衍夫氏僂儀裕久而悖常騁習俗之  
注錯旁佻離夫圻畷巴夷七姓蘭峒九羌莫不  
畏之如灼黥而賤之猶逐俵奮討則悖侃稽誅  
則攫攘眇茲僭拉蛩負鴟張釋毒痛而婚媾類  
釐孳相頡頏龔滅恭順咄咄鄉鄉振我錚鐸



用大創聞之王者握元模而運天權將以誅不  
寧之侯伐不庭之國蕞爾兩會如測水以牛蹏  
之涔度山以芥堙之塙社不足以墟而城不足  
以洫顧必揚四征九伐之威運五行十守之力  
積月屢歲縣蕪不革者豈不以藁絕崑批陸開  
逕塞犯瘠蟻岑雲霾蘚踣是猶句枉結縷非鏹  
胡匣戟之所能除蟻蛭黽穴非武衝扶胥之所

能卽也懷之而不嘔嘔怒之而不抑抑怒之以  
陂傜之性期之以傳噉之臆然猶夷固僻違叨  
怵殘賊則豈鑿齒必不殲於疇華之野而封豨  
終免戮於桑林之域哉

天子於是赫然震怒定策受成選校命將斤斤斲斲  
箕張二翼雷奮五兵巴朗夷而達圍滅資哩掃  
而美諾平獬熊逸異封狼就刑

皇威霍其大達批功噶以進征賊星未殞軍實偶撓  
右甄堅而岳峙命專鉞而擁旄桓桓定西秉畧  
神聖審高深於地維決奇資於天勝中黃育獲機駭  
電應分道選鋒互爲奇正大格曾頭之兀婁南  
壩卦礪之聯巨鈺之覲之以莫不定蓋不旬日  
而復收趨拉之境百戰殪寇指不勝詳頌

皇辭之鳥奕繹



崇碑於膠庠敬依比夫事緯之先後以拊本而引綱  
焉若夫谷噶西路峩峩嶸嶸伏旌羈於曠岫嘗  
蠶軼其若神崖成谷啓風雷震震電轟礫擊墜  
不暇奔血潰成霹靂飛格塵時則勦拉窠躡馬  
尼穴卡卡角而掉鞅屨庚特額而列轉窳窳鑿  
突搏援攬肆審錯規慮發無不逮然而絨布左  
回南路屏蔽阻同宜喜騁驚罔計於是西路之

師克羅博瓦五隊踰垠蘿揆木掖犯礪石而不  
擊待衝近以相堵殘胔墜脛歎山欲野岡下溯

普列礪以三熾熾熒於岨岨摧中堅如敗馘彼

引木以牒石我足躡而手拊穹步激礪焱焱炎

炎遂開圍而摠伏乃左挽而右攬負鎬埋谷醢

刃實廔斃厥甲首糝若脍臠則有喇穆在後徑

亘唧嘈儼謀搏總候徼支繚惟闕防於西北巔



絕峙夫兩碣捫頽珽交葭蒙前崖後廬肌負骸  
扛萬足奎踞籀月趨風拂突門而直上咸抃顛  
而捽匈披霧襲零城幽搏空躡跌碎折燃𩚑熾  
烽日則丫口踰險梯衝賊廼與奔糜之朽𩚑鱗  
彘兔於鴻置獻軍社以脅闕諱棍積而不容師  
橫橫而彌奮規地機於

帝聰越凱立葉之徑阻陸默格爾之崕從士皆鷁擊



而蚘應僂若掇蝨而撥糞也險恃兔窟有康薩  
爾枚列三行越塹靡壘轆仰塗而擊擲抗角距  
而未破據庖廂以覆身乃匿肱而見跼疾鍛先  
霆人與石靡塞窖壅郗三碣畢毀木思工噉胥  
剗其窟遵巖陁而下摧眎勒圍乃在錡伊絨布  
之鉦鐸旣合力於宜喜下甲索與得楞迤山椒  
而直指谷名撒撒嶙嶭碗硯闞笱門而列柵守

笠居而築堦奮句卒以撞挾火輜紛而環起維  
日旁之崇山屯石包之蜂背梯阻獬狻徑絕虻  
蟻挖陘批幽銜糜潛軌祕響叢篁攝影昏晷跡  
嚶嶼而上騰襲豺獏以後倚阪截奔蹶風零斷  
趾礮魂瞿瞿絘木縈藟沙壩阻而鷹瞵欲奮援  
而旋跬跨谷彌阜投戈淮弛蓋木鉤而樵抱甄  
而汲者胥貫膺屬腸而陵藉乎五十餘里趨趨

粒糲拔額爾替伊石真噶雕悍狼噬双屺狂趨  
塗開險盭覆赤爾寨於厓墳趾沙爾尼於河滌  
氣震川騰汨活澎湃方斯時也兩軍夾河騃騃  
彤彤如鞞與鞞均和節同或攢鏃以旁扼或擁  
鐳而反攻宛鉅鐵鉋慘如蠶蜂望絕沙火逃乎  
磧蓬積雪儵其歸截臨洪川而作峯濤飛木颯  
聞聲怔忡械筏朝失飛縲夕窮奔溺萬指肉漬



波融蓋已旌摩乎噶爾丹寺而劍及乎遜克爾

宗亞斯以往峭陁鬱紆拉枯下峙而列埒昆色

上聳而連巘如戶有楸如枿輾檻將欲捏畢乎

峴鬪之隙攫搏乎仄房之區非隱埵防而設覆

梯林蕭而趾虛仰掬俯擊神扶電扶其何能翦

狂獗於金血墜枉矢於地廬哉菑則大海餘氛

既熄嘽嘽嘆嘆奮力固植獸躡禽檜失其劣崩

且夫勒圍據大渡之極源環峭嶭以滙沅界托  
古魯之交全倚隆斯得而奮翬經樓坵其南冷  
角測其北渠檐虎落天羅地棘赤莖青羽聯翩  
霍繹本末極乎蕭楯之原又何虞乎游闕之迹  
一旦薄伐肘不掩腋騰礮石於列庖似燧燧之  
糜稊水可輯而絕杭山有廬而莫匿豨猯嘯竄  
以憎懷夔魑咍唏而憐愬則豈非陶誕突盜之

靡可原而僑狝愬愬之用是殛歟是月也獮誓

畢表貉祠

華轆蹕塞射殪狂犀威靈紛紜旭旭嘻嘻馳桃關  
而申捷圓璧湛其澄輝感招拒之肅德抗

王鈇而必夷天人合發廓是

鴻規襟要約之險阻指西里以綰枹築篋籬於遮街

衆犯險而不渝迺燂薪一而燧木夷盥戶之獮獮



熾熾炔炔燿燿焮焮焮膚脂流自灼骼不及枯磨空  
鹿毀燿煤燭郭士氣赳赳奮撈科布翼前距後  
司間審慮憍悍虓豁所向悽遽劓蠡痲披棄甲  
空戍索隆邈迤一蹶而仆溯蚘蟪之奮張恃呪  
師以爲固奉雍中與舍齊扼內垠之門戶何雲  
徹而席卷竟愕愴而莫詛耀星弧於九天抵噶  
依而環注越河而西殼騎繁驚勦阿爾古而鋒

膏瞰獨古木而輻赴開道乃當甲雜旁附氣踢  
跌乎獨松聲雷碾而東渡抗馬邦之戈鉞通南  
北之擊互據四會以圍巢賊烘蛩乎安措於是

乘距堙處軍輯徂蒺藜環柶杙鐘錐列鑽句鉞  
剡鐔焟焟倏倏而外屯飛蚩平題參連鳴嗃颯  
颯紛紛而旁激弩臺屹以外睨壕橋通而中逼  
焚甕城與團樓窮嬰冥於地防是已蹈其腹而

割其腸乃今俵俵渠渠而不知所息厥室倓逃  
剗諸糾纏爰踉蹌以就誅奉綯綬而涕拭縛黎  
鮐於鋹餘繁媯僚於輜側鳩骨肉之蟬啗望質  
鉄而色墨肱於沙而思水徒愬愬而罔得也觸  
於罍而修聽祇恣恣而茲惑也神怒孽氛將奉  
天德圍坑斥之駢田聚窟狡而壹克練吉日謁

橋山溯連鑠於



烈祖用嘉薦夫瓚粢神靈期會捷至臚懽稽上陵於漢  
典咨民事於神軒彼馨告夫常度孰能方乎  
聖武之遠殫禋柴躡

岱輦掖

天安陳芬

闕里醇美譽然文種武植

聖心以宣

龍輶旋乎東封赤羽回乎西徼類

帝告功封瓚植旒臚五等以升成肅三行而面表饒吹

疑會旌幄窅窅擁鐸拱稽霞煜星燦吳旂魯敵

絞紛拂標

天子用是嘉決勝於提賁勞殊勤於橫草統協祐之  
鴻謨曰欽承於

靈界申尉律息師徒司儀侍司士趨肅

廟

社以獻凱

莅魏闕而受俘華蓋承辰弧旌燭輿鞬衣韎韜赫戲  
駢瞿彼夫夸焉此催淖潑瀆汚莫識輝烈之光  
燭故甘剗骨而剗膚膏鏃鏃以明罰悚僑泄之  
必誅鏹鏹列列延光照寓稱隆

似姜均禧九土圖麒麟而霞芬襲洪輝於圭組被



融祉之函蒙奉

鴻施之蕃詡信緯遠而登祥咸滋熙而圜煦欽勒崇

於

睿文中外迪乎

茂矩銷矜又爲鑿鑿總萬嗣而偃武

臣

備員禮官逃

裔是司伏覩乎

皇上德寓天覆粲晏博被苟面內其必恤克濯溢而

不疑譬髡屯之犁牛猶決鼻其在羈矧夫萬萬  
而屯億億而興誠戈指而踵企將翼之於大寧  
惟直路以怙逆豈平典所復矜一蚋嚼膚菜蕪  
至旦負固勃亂小不可翫始倚契而司詐終隴  
種而墮斷炎曦甄耀鳴陽窸窳之孽潛懸象軌  
度絀流旬始之精散侯其禕而光鳥繹乎寰甸  
已仁以爲守義以爲行放準修繩達昏曠明蔽

元宰而

法勅運師術於隆平撫縛絀而覆露震惛漠而聳誠  
萬國元靜泰柄握衡夫寧惟是推捨捨而攻揭  
揭而同於廣斥勤遠之用兵哉



樹而固以實氣備致以風其時或可謂終  
萬國之精未既其德夫與其壯壯待命而  
志欲與神論其到平其德而靈靈靈靈而  
云卒而為守義以為行放準修繩皆皆明明

平定兩金川擬露布一首

翰林院侍讀學士臣紀昀

臣聞威揚星鉞非螳斧所能支怒奮雷碾雖羶  
叢而亦闢應天者勝定申四豕之誅恃險者亡  
難負三苗之固故王師仗順歷百戰而無前遺  
寇偷生終一朝而就繫靈夔震吼西人之膽全  
寒雄虺摧藏南粵之纓遂繫恭承

磨畧已縛渠魁竊惟兩金川者俗帶蠻荒人原羌族  
金牛關道爲五丁未鑿之餘玉斧分疆在一水  
相連之外九氏雜處率遺種於冉駹八國參居  
盡隸名於默啜路通的博問唐戍而皆迷郡接  
汶山出漢封而更遠蓋四萬八千歲後至建興  
始控以城而五百六十人中在嘉靖尚名以寺  
羈縻勿絕古來徒繫虛名叛服不常此輩遂成



天性泊我

朝龍驤討罪初定峨岷狼種傾忱全收邛笮桃關  
置埃已歸版籍之中橦布輸賓久定臣民之分  
百年培養漸如奚別東西兩部區分遂似宛名

大小沐

天朝之雨露各長子孫割蠻土之山川自成聚落而  
乃中山狡獸最解忘恩西部遺羌從來善盜包

藏桀黠縱橫黃石之墟突肆貪殘蹂躪青衣之  
外吠同蜀犬忽爭骨以磨牙毒類巴蛇竟擘山  
而掉尾往者戊辰之撻伐玉弩騰芒實因郎卡  
之憑凌銅頭與暴乃以驚弦落羽梟不東飛負  
矢哀鳴鵠知北向

天心仁愛許還松堡之師

聖度宏寬容免竹王之戮凡以綏柔荒裔俾板楯之

知歸何期孤負

深恩仍夜郎之自大爪牙暫戢密蓄機心羽翼未成  
轉修舊好吐蕃嫁女羈勃律之歸唐并罕釋讐  
結先零而窺漢陰謀未遂十稔先盈遺孽猶存  
九嬰彌亂凶殘有種索諾木虺復爲蛇貪冒無  
知佞格桑狐因假虎莎車搆怨稱戈鄯善之城  
般嚙典戎喋血羅支之帳四鄰俶擾月明而軍



析宵驚二豎披猖風吼而戰雲晝起釁生同室  
雖爲蝸角之爭境接中原漸慮犬牙之錯屢吹  
毒焰似聞狂烈遺風敢播謠詞擬逼姜維故壘  
蓋兩階干羽終莫格其頑心八陣風雲自宜申  
其顯討乃以邊臣計左未能宣布

天威閩帥謀踈無以欽承

廟算始則印歸邛谷陽受約而彌驕繼乃城屬兜題

已失巢而復得僧格桑投林兔將三窟之重  
營索諾木振羽奇鶻更九頭之彌點借降人以  
用謀初同婦嫁維州留部長而不歸正似王囚  
阿惡迹其質渠以割地具有深謀足知挾衆以  
窺邊終爲後患敢圖悖逆僉云罪以通天苟不  
剪除深恐勢將滋蔓

皇上是以威操湯鉞迅調銅符武震軒夔重開玉帳

乾隆癸巳六月

詔以臣阿桂爲定西將軍以臣豐昇額臣明亮爲之

副握虎鈴以命將星動河魁引鶴列以陳師風

馳山子旗分柳綠滇黔秦楚之兵禱映花紅彭

濮微髮之卒宣明賞罰令嚴而壁壘一新簡汰  
疲癯氣奮而笳簫倍響復以

禁中羽騎初時未果從征因而城上整弧所向莫



爲前導牙璋飛召爰蒐健銳之雄桐鼓交鳴併  
簡索倫之衆攜來飛矢天邊齊射狼星倚作長  
城闔外寧驚鶴唳四奇四正共成風后之圖九  
拒九攻誓繫溫禺之血龍吟畫角雪山之亂石  
皆鳴馬振連錢玉壘之危峯欲動蓋將永清乎  
邊徼務在擒王所以大合乎軍鋒不辭用衆  
星樞高挈周萬里以提衡地絡岐分用三驅而取道

睿謀指示共瞻

軒帝南車衆志驍騰齊出益州北部一軍別駐俾成  
彙尾之形兩路兼攻各據擣虛之勢山川聚米  
已全境之周羅戈甲捎雲乃中權之架人是歲  
十月<sub>臣</sub>阿桂等由資哩諸處進兵收復鄂克什  
官寨芙蓉淬刃新軍皆初試之鋒辟荔懸崖舊  
路是曾經之地綏人宵潰競自棄其印籠楚幕

晨空俄全清乎甌脫川原如故已遷之邢鄆仍  
歸井竈不移待救之江黃先慰十一月進攻路  
頂宗明郭宗收復美諾千重鬱律青壁無梯一  
綫延緣黃雲迷徑當年伏莽僧格桑借以潛藏  
此日負嶠索諾木恃爲障蔽崇墉再伐尚因壘  
而不降齊燼重收竟背城而思戰櫓槍焰吐囂  
矜之氣方張睥睨塵昏格鬪之聲遂合風生勅



弩平驅犀手三千雪壓危巒直接雲梯七百弓  
刀爭響峻嶒之石骨皆摧樓櫓平頽眈眈之旄  
頭倏墮揚旂搥鼓一時三逐殘兵按籍披圖兩  
日再收故地闕其門戶已搆長狄之喉撤彼藩  
籬早斷匈奴之臂甲午正月進攻谷噶了口初  
臨寇境一丸早已泥封橫阻前茅千嶂都如笏  
插蜂房密綴異敗亡鳩合之餘虺毒橫吹正僥

倖鴟張之後銅丸走坂憑高者藉勢囂爭石角  
鈎衣躡險者排空馳突弩張劒拔兩軍之銳氣  
皆新雷轉山驚三鼓之餘音不竭誼呼沸地似  
翻骨母之潮烟焰迷天忽結蚩尤之霧戰酣不  
解應龍之翼彌張力竭難支妖鳥之巢乃覆於  
時臣明亮亦由赤爾丹思攻破馬尼牙旗並建  
輔車之勢相維羽檄遙通犄角之形早據獨當

要路旣無旁顧之虞徑擣中堅益奮直前之氣

三月臣阿桂抵羅博瓦外郭是恃秦人倚函谷

之關舊壘原堅晉帥阻偏陽之國四峯矗立高  
深並自難窮八壘回環左右皆能相救羊腸詰

曲非一旅所能攻畦徑紆環乃五軍之並進分  
朋列隊數符太乙之旂飛矢揚兵氣壓常山之  
陣參差迭起驚飄瞥之無恒蹂躪橫行駭枝梧



之不定山精血染倏半化於青燐木魅巢傾遽

罷吹其碧火會以風吹山帶乍浮迎陣之雲水

挽天河預灑洗兵之雨苔衣夜滑未利行師嵐

氣晨蒸且留養銳計其時日正同虞帝之七旬

簡我師徒乃及宣王之六月是月克色溯普進

克喇穆喇穆及日則丫口七月又克該布達什

諾木城及格魯瓦角諸寨兩軍夾擊都如絕地

而飛一隊潛行忽似自天而下四山陰合霧濃  
而伏豹爭騰萬木聲號雨急而怒龍奮攫蠻獍  
密挂雖側足以難登鬼彈驚飛終仰攻而不避  
丹厓平裂真彎沒石之弓翠巘中摧如有破山  
之劍轉鬪萬峯之下幾歷千盤出師一月之中  
因成三捷兼以橫摧鈎楯道如刊木而通因之  
徧爇團蕉勢似焚山而獵雷能破柱一聲而斷

柿紛披火自生風四顧而殘煤全舞地中鼓角  
眞草木之皆驚雲外旌旗早山川之相望重巖  
複岫巨靈之蹠齊開羈魄殘魂貳負之尸遂械  
然而大軍未合猶紆道以求通黠寇多岐當出  
奇以制勝披榛得路一時幾費時嶮括地成圖  
萬里乃蒙

鑒照與



天合契信必克而無疑惟

聖前知果圖功而有獲十月由日爾八當噶之下榮  
噶爾博之上取道攻得默格爾進據密拉噶拉  
木併克凱立葉諸寨武陽別出廣漢先驚斜谷  
方開陳倉徑度股肱雖在拊其背而難施首尾  
空存斷其中而莫救颺輪捲地聲酣而山鬼皆  
逃火繳燒雲勢烈而沙蟲俱化三周不注連逐

齊師一出井陘併空趙壁深林搜伏旁批蟻穴  
之柯高嶺屯兵徑卓虎牙之帳乙未正月克康  
薩爾四月克木思工噶克了口山河表裏勢旣  
居高谿谷崕岬逕尤絕陡過斯以往俯攻卽似  
建旆據此而爭死守亦同奪刃困猶力鬪更憑  
九折之厓險已難升兼阻千秋之雪賊先有備  
伺得隙而後投兵貴乘虛待不虞而始動梯衝



忽合易水晨驚鵝鴨齊鳴蔡州夜襲一則遲以  
兩月用三日而畢收一則稽以九旬越一旬而  
立潰要津得據武牢竟扼其吭大勢全歸上黨  
已居其脊艱難爭險頻年幾度持籌奮迅摧堅  
茲夕始爲如志然而遜克爾宗者縣車束馬我  
原避險而來穀弩枕戈彼尚增埤而守小能害  
大舊聞蜂虿之言後或乘前古有螳蟬之譬五



月旣得噶爾其寺噶朗噶舍圖枉卡乃遣

臣豐

昇額等銜枚卷甲曲厯蛇盤附葛攀藤直探虎  
穴神方助順霧迷五里之陰人盡潛踪花隱百  
重之影一呼勿起震屋瓦以羣飛諸道交攻數  
闔枚而已逼爾弓爾弩排闥難施我斧我斨鑿  
垣競入豺狼當道於今忽得全平魑魅不逢從  
此無憂竊發七月進攻昆色爾及拉枯寺喇嘛

科布三寨菑則大海諸處霜濃霧滑未怯山行

日黑風高最宜夜戰直摩溝壘爭看突將先登

已逼門庭肯聽<sup>鐵</sup>奴死拒萬山皆響立頽鉅鹿

之沙一炬橫飛<sup>並</sup>烈崑岡之火布金成地唱梵

唄而無靈築石<sup>為</sup>居濺蠻墟而悉掃六丁雷電

橫驅者甫屆三劫兩路麾幢會合者遂臨一水

適<sup>臣</sup>明亮既破<sup>山</sup>且喜之後亦廓清日旁一路五

十餘里進攻額爾替石真噶諸寨盡得上下沙  
爾尼之地雕旗遙望欣聲勢之相通金柝時聞  
覺威稜之益壯成功有日約共繫夫凶渠乘勝  
遄驅遂先圍其舊砦八月大兵攻勒烏圍五重  
危磴鐵骨含青一帶洪河銀濤翻白高墉揭蘖  
共成獸角之形堅壘周環曾是鴟蹲之地噶拉  
依遙資屏障儼築重關轉經樓近與毗連竟成



夾寨潰兵歸保逆徒猶自蜂屯大旆臨攻醜旅  
依然螳拒於是鈎連長棧先防援應之途緮曳  
飛杠預斷逋逃之路平堙坎窞竊同韓信囊沙  
橫激雷霆未許劉鄩掘地長圍旣合俄飛走之  
俱窮孤堞將傾乃騰凌而並入金戈晃耀三千  
之控鶴齊呼玉宇高寒十五之明蟾恰滿四圍  
礮火中天掣列缺之鞭一片刀光半夜射望舒

之魄堅城旣破眞看驚令浮尸窮寇仍追會遣

樓蘭對簿十一月進克西里科布曲索隆古兜

窩又克朗阿古則朗噶克了口旋據噶占十二

月由瑪爾古當噶取舍齊雍中兩寺遂直擣噶

拉依屢征屢下全成破竹之形彌入彌深真類

剝牀之象迫於頃刻信幕燕之知危緩以須臾

尚釜魚之乞活盤瓠之六男六女多隨母以歸



誠哀牢之十子十妻半挈家而納歎惟茲逆豎  
守陴之哭已聞自保孤城銜璧之迎未肯旣而

臣  
明亮等掃清河西諸處渡河而來後路之兵

亦乘勢招撫咱普庚額特曾達諸寨隨而續至

大軍旣會一時燦若星繁列校爭前四面圍如  
月暈雲羅萬里周陟而飛鳥難逃鐵網千絲截  
水而游鱗不度外援已絕鳶無可寄之書內顧



無謀歸是已窮之技不降不戰理難聽其苟延  
且撫且攻勢將出於生縛乃乘彼亂渴無拜井  
之泉爰鼓我師怒躍射彘之矢火珠激迸烟漲  
成雲金彈碎膏焰飛掣電戰塵瀕洞聲喧而地  
軸皆搖殺氣蒼黃力猛而天梯直上逆酋索諾  
木求生無計餘息空存欲死不能驚魂先餒諭  
之莫省不爲鄭伯牽羊悔亦難追乃向班超抱

馬遂率其兄弟莎羅奔甲爾瓦沃雜爾斯丹巴  
及兩土婦與大頭人丹巴沃雜爾阿木魯綽窩  
斯甲尼瑪噶喇克巴偕兩喇嘛挈所屬二千餘  
人捧印麾前泥首乞命夙沙自潰窟穴全空盤  
橐成禽妻孥並繫狂童右桎不留梟獍之蹤孽  
黨反衿未漏鯨鯢之網剷壕處處業已焚巢貫  
索纍纍非同獻馘妖星墮地雲開石紐之山魔

雨回晴花暖桃川之樹北上之檻車一發九姓  
知威西師之鏡吹將還六軍奏凱粵自戊辰以  
後凡兩征而邊釁始清聿從辛卯以來經五載  
而戎機乃藏蓋事殊擒闢路別中原勢異征淮  
據非平地削成峭壁山山皆九渡之河縋出懸  
崖步步是七盤之嶺隨心取徑更無蜀棧相連  
到處藏兵總覺峭師可禦故其地僅千餘里而



往來莫得其途其衆僅三萬人而出沒莫知其  
數仰賴我

皇上珠鈐獨握密運兵謀金鏡高懸孰籌地理申明  
國典飭司馬之明條汰斥邊軍選羽林之勍旅發  
金錢而弗惜民不知勞輓芻粟以常充士皆宿

飽

恩威並用人人懷効命之心

指授無遺事事稟先機之算所以稍稍歲月終得有  
成備歷崎嶇卒能奏績魚蠶未闢之地列戍開  
屯葛姜莫到之鄉陳師鞠旅罪人斯得藁街待  
正明刑荒徼咸寧板屋永霑

渥澤黎風雅雨和甘過大渡河邊羌竹蠻花葱蔚接  
無憂城外巴渝舊舞齊隨破陣之歌蜀國新弦  
總奏平邊之樂往者天山左右宣威而宛馬東

來今茲益部西南討叛而參狼內向後先一轍  
總

聖皇獨運之謨上下千年皆舊史未聞之事從茲鏡

歌十曲名岐伯以重增定知譯曲三章接唐敢

而踵獻域中慶洽闔外歡騰臣等仰藉

聲靈幸禽醜逆星郵迅發剋期書到甘泉雲棧飛馳

側想邑名聞喜戢兵轡野彌昭



軒皇教戰之功偃伯靈臺聿瞻

姬室修文之盛

臣

等曷勝踴躍歡忭之至謹奉露布

以

聞



平定兩金川闡謨

謹序

翰林院侍講學士臣朱珪

皇上至仁天幬知臨幾灼神武乾斷初討金川服則  
舍之不訖厥誅旣而蕩伊犁收回部光

列聖之緒闢地二萬餘里極天西北哈薩克布魯特鄂  
罕土爾扈特咸先後歸命內屬土圭測影至於  
日入之部枕矣晷矣古未有也乃促浸僭拉比



惡備德大師克之五年掃其窟巢罪人族俘由

成大釐臣伏讀

御製平定兩金川告成太學碑文暨

勒銘美諾勒烏圍噶拉依之碑仰惟

聖謨淵齋

天佑信順靖民之勲一勤永救猶

心惻衆勞若將不及蓋堯禹之克讓克艱不矜不代

大聖人用心萬古一揆也

臣珪

蒙

恩慈再入翰林欣覲

盛烈愧黤淺荒落無毫髮禪效注鳴翼振亦欲鼓舞  
太陽太和之光氣竊不自量作闡謨一篇庶竭攄愚

忱宣繹

天子睿聖功德颺於無疆謹頓首以獻其辭曰

天以大氣束九輪陰擎陽張亭毒墮崘或戴景

而衛跡或匿暎而巢蟲馮生攫網孰溢靜是厥  
惟大君仁以均之知以先之勇以剋之有不若  
廸辟以止辟所以康兆民也故潰夙沙塵絕纒  
疇華誅三危竄有扈勦絕鬼方旣濟聖人皆祇  
之非得已也昔周舞庸蜀秦嘲牧犢蹊其金牛  
卽於白鹿漢開四郡笮駝變俗深入不毛葛姜  
之勞有唐不競遂驕吐蕃麋谷清水要盟屢寒



羌耽視乎全蜀迺嫁婦於維州謀而取之城曰  
無憂牛李爭柄殺悉怛謀金川故縣小封更置  
王建徙州棄其地利劃大渡以玉斧宋割險而  
不治元設礪門暨長河西明障雜谷鄰金川寺  
稍蠶食之聿遷其地夫金川者固三十三番之  
黑子而董卜韓胡之細也邛籠之巢獲瓜乎上  
礪下礪牛皮之筏箭栝乎沱水孫水繩橋縣度

之摩曳白狗白蘭之脣齒連天萬巉絕地寸跬  
遠達烏斯之藏俯瞰井絡之底苟蠱尾之有毒  
雖顛孽其必掎

皇天啓佑我

國家自我

列祖出震御天八紘八彙同於太平

皇帝紹

重光求民莫兢兢乾乾無一夫不被潤澤惟十有三年

金川用師則以促浸之蹂僭拉而澤旺韞也元

戈西揭郎卡面革

帝曰宥之是我大有造於爾金川而不利其瘠也

天畀所覆何遠不轉犁伊犁爲平川芻宛馬於內廐準

夷四衛屯田列堠其陽城郭至拔達山葱嶺和

闡實窮河源徵張騫之鹽澤辨篤實之火敦遂



臨西海真睹崑崙二萬里外國之西門徑乾陬  
而包坤角彼汝山華離之地曷足云乎然而

天緯旭卉機發必克僭拉首禍促浸僭德澤旺昏而僧

格桑世其凶郎卡死而索諾木稔其慝始則賢  
栗擒乎鹿芴旣而劓女妻乎無弋狼狽負固而  
逆命歷驢同難而薦食亂革布之室家躡鄂什

之疆域

天子以爲鞏金隄者堙螿穴力原田者芟陂芳不一  
勞不可以久逸不暫費不可以永寧師出以律  
否臧是懲枕參首而

命將執螯弧以先登於是摧巴朗復革布資哩旣克

美諾入據毳兔走其三窟飛蟲懸於一縷姑句

跳而從其妻迷唐號而夷其父方移金鼓於昔  
嶺詰罪人之逃逋賊乃善幻山鬼夜譁乘無備

之莫敖戕致果之狼暉小往大來一發一歛

天將盈而殲旃故不可以五稔也當噶一路整軍而出

皇帝申命阿桂益汝吉林索倫黑龍江暨健銳火器

命凡兵七千惟汝定西將軍帥之時則天策電掣

虎螭麋至六軍一心

廟算神契西南夾擊大風掃隧隕八卦之連雲剗兩

宗於浹日再收美諾而僭拉之功訖矣



詔攝提格摩泰一鏖鑿天險誅魁兇馬尼南博谷噶  
西縱宜喜絨布角犄肩膊西路大軍直鉞羅博  
色溯拉穆抵於默格忽超前而蹠後稟

九重之指攜鏡萬里如投籥康薩爾梁嶮嶠劍鉞太  
古積雪嵯峩龜裂九鳥不照飛鳶顛澆木思工  
噶裕訝問豁三年之咀一日而掇其時北師自  
日旁茹寨攻石真噶沙爾尼戰河之西而大軍

克噶爾丹及噶朗噶踞高而控低刷遜克爾宗  
如鞭尻睢仰剗昆色火炎拉枯菑則大海燁燻  
池魚拔柵木以爲棧凌章噶而上梯遂披冷角  
寺次於勒烏圍是惟賊之舊巢錮重甍而獨牢  
轟經樓於天半礪卡傑僂而錯交困獸入穴層  
厂外包五丁顧而躑躅九攻盡而莫挑於是槎  
林樹柵截河椽栒鈎鼉鼉而石筍折燧龍牛而

冰崖鍛擁沙囊於上流鳴鼓角於地竈降天出  
淵神駭鬼暝中秋之望圓靈鏡空蕩滌月峭蕭  
條天風鯨鯢他藉招搖奏功遂以夜半克勒烏

圍捷書八日

聞於木蘭之

帷宮我軍合圍逼噶拉依路梁踰溝先克西里乘  
其高標風怒火舉奪科布曲及索隆古舍齊雍



中趾入庭戶南北兩路破竹解瓦掃獨松驅馬  
邦大會於麾下乃籍狸物火螫獸投焚石碧天  
鼓纒棗影馳蠖蠊不漏扇鑪鞞於大冶鑠崑岡  
而裂吼豨菹翫投絕其哺穀庭焚籲天罪大莫  
宥於是嬰姍媿徒斑蘭精夫鳥語哀牢之母項  
髻朱戴之婦槃瓠則男女搖尾鄆瞞則兄弟駢  
首窮紉匍匐乞命晷刻乾隆四十有一年春二

月丙午索諾木率其兄弟莎羅奔甲爾瓦沃雜  
爾斯丹巴及助惡大頭人丹巴沃雜爾等就擒  
於軍金川平甲寅

帝方祇謁

東陵

蹕桃花寺紅旗至惟

皇天

列祖孚佑

聖志中外大悅

神人咸喜

皇帝曰吁惟將軍阿桂百戰藏事功第一列爵上公  
有加賜自副將軍以下論功封賞以差圖形  
紫光閣相臣將臣冠劍鱗次乃徵

帝典攏



文思

銘大學之碑暨美諾勒烏圍噶拉依

天子穆然念康功甚勤而勅

命之不易也一篇之中三復致意竭石鼓而汁五緯廟

玉壘而表萬禩告功

泰陵

大孝繼

志扶

安輿啓華芝澤春淀延

蕃釐甘雨滲漉條風旖旎

日車臨乎青兗顛大觀而瞻

德威

登岱宗陋亭云告成

闕里偃伯秩文復租稅却貢琛養耆老甄秀峻旋

龍舟棹析津覽來牟之苗畝樂豐年之粍與孟夏  
之月六軍凱歸乃

幸良鄉郊臺而勞之萬騎按隊鏡螺震天猊甲虎韞  
觀者如雲

皇上率百官謁

天受祉張黃龍之纛

御翠鳳之邸將軍前跽行抱見禮



天光霽穆

清問燕喜乃扈

鑿啓行馬上奏

凱歌三十章擷常杜之華  
皖韻勺箭之鏗清鈞天  
雲門訢合歡聲歸於

帝京前期以索諾木及其人屬獻於

太廟

太社

皇帝乃御午門司馬牽組司寇致辟受俘於

闕下五月朔恭加上

聖母皇太后徽號曰

崇慶慈宣康惠敦和裕壽純禧恭懿安祺寧豫

皇太后惟億億年萬方咸

寧六合由

豫惟

聖母篤

天禱祐乃

頒詔天下告於

郊壇徧於羣祀行慶施惠莫不煦嫗朝賡衢歌雍雍乎

羣雅鏘鏘乎九夏

訃謨定頌聲作乃爲遠人畏德感德樂德三章之詩



備鞮屨焉畏德詩曰羌氏石處雪霜之窟山巒  
蔽虧不見日月大夏涸凍不知寒苦

天威赫𦉳霹靂澍雨鑿巖築碣莫我堅厚塹江笮橋  
莫汝險溜今何有哉蕩蕩戶牖趨拉函顛促浸  
族拘兄弟母孥長繩曳婁蜀之西北有大山海  
皇帝治之亘二萬里傳告種人東面拜跪

皇帝萬壽有向無倍感德詩曰昔九土司日夜弄兵

爾牙我肉狼藉壑阮革布什咱爲促浸斫掠其  
婦女嫵嫵嫩弱彼鄂克什與趨拉讐埋蠱詛呪  
俾汝虔劉謂維州橋可以踉蹌鶴鷗仰嚇

天奪汝魄

皇帝

天哉誅鋤罪人殲彼豺狼卹此寡矜自今以始我田我  
麥我羊我牛莫我辛螯毫毳班剝勃宰蹈舞

皇帝萬壽心歸

大父樂德詩曰峨峨岷山湛湛江水去天一尺江歸

於海正陽化醇熙熙若春壬哉林哉今爲內民

夏有甘露秋無肅風冬日曠暄雪冰和融蜀土

磽腴咸

賜復除赦過宥罪與民墜甦疑疑都護我鎮我撫昫

昫屯田我戍我保白狼槃木樂漢之大烏斯朶



甘吐蕃邏娑

天錫

皇帝覆育中外日月出入無有疆界

聖德高厚恩澤周匝

皇帝萬壽與

天意合陳詩歌之

人之孚極於四和是故一夫不獲坐以待斫惟

皇帝仁榮鏡萬幾不應徯志惟

皇帝知勿貳勿疑九圍以鞏惟

皇帝勇百姓日用而不知

聖人之謨豈不睿哉堯曰日慎一日舜曰惟時惟幾  
禹曰孜孜德先祇台故動則有開必先靜則中  
心無爲以至於萬年鞏我不丕基

少與敵以至於首領皆獲其功

再日定郊外與我兵相見其間必欲請假出

聖人之期豈不報其我日日對一日報日謝其

臣前報有日臥而不眠

皇帝陛下及臣等以率辦

皇恩曰我為君效死不以給志謝後坐以待折惟



平定兩金川論

上下二篇  
謹序

江蘇

學

政臣 彭元瑞

維我

皇上文武聖神克集

大勳兩金川全境蕩平逆酋授首梟其母姑兄弟頭

人等生纍駢繫咸膏齊斧蓋距戊辰受降二十

有九年距辛巳平定西域十有六年前後異宜

大小殊勢惟

聖人之心無弗周故

聖人之功無弗成要其奉

天討稟

睿謨用底我

偉績是謂大同

臣

恭聆

鴻捷踴躍忭舞自惟在遠不獲親見

闕下受俘之

上儀顧數年以來仰繹

論旨

詩文審知茲事體大亦異有所發明而見聞窳繁文  
又冗弱大思無以稱塞謹著論上下二篇殫竭  
愚慮期萬一推測

化神妙用以致茲



顯功駿烈重臻叠奏之盛臣誠歡誠喜誠愧誠悚稽

首頓首

論上

金川之事昉於乾隆丙寅年受降於戊辰年亦

既包蒙之今而征之且勦絕之前後異宜甚矣

聖人之大也天地之道風雨露雷遷化流形春生固

生秋殺亦生

聖人之道仁育義正不蔽於物不偏於用不泥於時  
惟其當而已矣戊辰之受降其前事已不具論  
既受降十年郎卡復稱兵不靖倣擾其鄰封狼  
獶羆以至索諾木習爲故常僧格桑始釁終合  
蛩蛩距驢魚爛獸鋌夫趙拉促侵我九土司之  
二也其所擾之革布什咱等亦我土司也郡縣  
之吏一丈書相齟齬則大吏以聞於朝而從黜

之有兩匹夫於此戟手而詈張拳而鬥朝廷之  
命官治之殺人者死傷人者抵臯曰

王章也

王者無外視土司猶郡縣也視蠹屯蝥聚之衆猶兩  
匹夫也

諭之而不革威之而不懾是怙終也虞書曰怙終賊  
刑矧復有至維州橋之謠維州



天子之內地禮曰以足蹴路馬芻有誅齒路馬有誅

以彼黑子之地烏合之衆若羣鼠自鬪穴中耳

聖人固萬萬無至維州事而敢於造作言語無復忌

憚將例以齒馬蹴芻之罪實倍萬也而能無誅

乎然則前之降得無不誠戊辰之役我師深入

滅此朝食窮猿投林枯魚泣釜以自丐其命安

得不誠

聖人先覺不事逆億初何嘗計後此之滋擾而不受  
之卽安知非

昊蒼降鑒其不誠俾反復侵敗以稔其惡盈其貫而卽

嚴誅而

聖人於是奉若而不違且夫力不足以滅之故赦之  
此漢唐宋中盛之時所爲也惟恐後之力不能  
滅之故不赦之此漢唐宋全盛之時所爲也若

乃誠則赦之傾則滅之

聖人何庸心亦行所無事赦之惟我滅之亦惟我此  
又我

國家邳隆極盛之勢振古無前者也有今之平定  
而後知前之受降乃

聖人之大度而非屈於兵力之無如何有前之受降  
而後知今之平定因彼自作之孽不得已而用



之聲罪致討協乎

天心二事者交相爲用不蔽不偏不泥其斯以爲

聖人之大

論下

皇帝平西域收準回兩大部五年而

大功成金川兩土司耳視西域僅百之二三亦五年

而

大功成大小殊勢而

功同何也天下自外於王化者所恃有二曰恃其遠也故周宣王薄伐獫狁僅至太原曰恃其險也故三苗左洞庭右彭蠡而勞禹征高宗三年克鬼方著於易象西師之役拓地二萬里遠之至也稽古有事蜀徼者蠶殼魚鳧開國茫昧金牛開道秦謀遂成三代以前且無蜀矧桃關以外

乎漢通邛笮冉駹以爲遠至以文難蜀父老在  
今內地唐之維州陷於吐蕃旣來旋棄牛李交  
鬪明平播州水西兩土司乃遵義平越之地更  
爲腹裏然則金川在前代非不遠也我

國家版圖式廓一尉一候跨越無垠故金川不可  
以言遠專以險金川之險阻隘而多山重岡疊  
嶂蔽虧天日兩山之間人聲聞影接相去數十



里夾爲阨谷蒸爲沮洳地又多雨雪道隱氣寒  
逆酋於其要害築堅礮守之森若林立蠹若雲  
上我仰而攻彼瞰而守肉薄魚貫不能成列故  
能負嶠阻兵苟延殘喘遲之以至五年夫大且  
遠者謂我不能至也如彼逐禽少縱卽逝九地  
九天罔不如意利在速小且險者將以老我師  
也十圍五攻反客爲主網收囊括久以困之不

病其遲

聖人之心無遠不邇無險不夷燭乎

幾先貫乎事後照之以

几席萬里如帷闔運之以

宵旰五年如一日若操

成算而符左券也禁旅出土氣奮重帑發轉饟裕士

飽馬騰吳不知兵遂以犄谷鳴剽宜喜鞞日旁

膊昆色盪默格爾康薩爾再剗美諾轟勒烏圍  
環決噶拉依水斷魚鼈草刈狐兔長圍旣合飛  
走路窮器諱緩死終夜有聲宵壘旣闢頸組相  
屬濟惡之族助虐之醜類燠穴焚巢無一兔脫  
茂矣美矣盛矣大矣其斯爲

大武之全功也乎昔漢誅南越餘善而弟郢懸宛  
王母寡首而其貴人不出宋虜繼遷之母而地



斤澤逃奪崑崙關而儂智高不得明三定南交  
檻黎季犛黎澄而黎利蘖芽以畔伊古以來用  
師邊徼者功未有如

今日者也故有平定西域之

大功卽不可不有平定兩金川之

大功孔子曰我戰則克祭則受福

聖人之功所以成者不同其

揆幾決理以成之者則一也謂遠可負曷不觀準回  
兩部謂險可支曷不觀金川兩土司揚

大清之

天聲極天覆地載六幕之內聞之者孰不陸震水齧  
褫魄而膽落也孰不廩廩焉如兵在其頸也孰  
不如燎火炳蓬疾風捲秋籜也殷武之五章曰  
赫赫厥聲濯濯厥靈其二章曰自彼氏羌莫敢

不來享莫敢不來王爲

今日頌也



擬九姓土司箴四首

謹序

國子

監

助

教

臣

吳省蘭

乾隆四十一年春二月丙午

王師克噶喇依促浸土司索諾木窮感丐厥命挈其  
帑奉符命降于軍前後就縛者厥母阿倉姑阿  
青莎羅奔岡達克朋楚克甲爾瓦沃雜爾斯丹  
巴及黨惡頭人山塔爾薩木坦達什阿庫魯雍

中瓦爾結丹巴沃雜爾阿木魯綽窩斯甲尼瑪

噶喇克巴等盡俘以歸甲寅

皇帝薦成於

東陵捷音至

行在

詔班師爰設鎮於雅州設協於美諾迺戍相望邊障

無闕夏四月戊辰師還

上親勞於郊越翼日己巳

御午門受俘正以邦刑五月辛未朔

躬率王公百官加上

皇太后徽號乃宣布於四方懷柔百神

巡靖烝黎宙合以內喁喁歆成憬喻乎師貞之吉

而詰戎之出於弗獲己也廷臣依景鳧藻摛揆

毫翰上揜班馬轆韓柳吉克雍容揄揚以盡忠



孝臣之身陋曾罔敢置喙臣顧常伏誦

綸詔竊見五載以來羽書旁午

皇上握機運策求衣鄉晨起臣既盱安居細旃而

周慮乎絕徼峙芻茭儲軍實又太府金以萬計者七

千有奇

發策萬里決勝五百餘戰然後罪人斯得石留非欲

畚域民非欲僕也

聖人爲之者拯九姓之夷於焚溺澹其留也

秦元之仁罔弗覆燾

大君之量罔弗怙冒疇貉嘆而弗佑孰蠢蹶而弗鋤  
彰輝之權寧或爽歟昔郎卡以鷲悍之性恃其  
嶮邊睥睨番落睚眦仇方毒逐於徼外澤旺見  
繫僂拉且登之砧俎蚓連蛇粘不可爬梳所爭  
在蝸角而蹂躪及池魚

聖人有憂之是以有十三年之師鐘鼓效靈蹈其鋌  
鹿解澤旺之囚郎卡肉袒面縛搏頰和門蓋未  
抵其巢而已投戈歸命

皇帝矜憐悔罪之深曲體

吳緯好生之德釋其縛歸其地給其符聚其族謂蛇雀  
異類猶知所報否亦潛蝥坏戶耦俱無猜我邊  
夷庶永以告安堵也彼曾不悛曾未十稔蠢蠢



信門日尋干戈泊索諾木世濟其惡棄儼拉之  
舊怨而婚媾焉蜂則有螫虎負以翼燿火夜爇  
邊塵晝飛恣施夾壩攘竊烏拉招誘姦宄戕害  
鄰司劫奪符印而占據其室於是九姓之夷居  
不得晏其干闌服不得績其桐布是用籲救於  
我

大朝以除其患嚮使

天子靳徵調之繁惜敕峙之費任置吏之因循踵唐  
宋明之故事維州議棄引玉斧以畫之則侵并  
者豈特鄂克什而被戕者必不止革布什咱谿  
崗彪劫洊成邊患伊何底矣

宸衷獨斷往取其殘斥惰窳之散材毗緣督之英特  
則有熊罷之士不二心之臣勤恁旅力同仇敵  
愾乃奇正相間揆勢而後會慮捷而後進徼勦

受詘攬崑滌數子夜械相顧之尸鑿齒就疇華  
之戮狐羣鼠黨罄以周陟於是廢者興絕者繼  
巴寶騰肆笮馬伏阜晏然而樂玉燭之調非

聖仁之施能若是乎夫肇禍者召殃而助順者召祉

帝者順

天衆庶順則有明效矣卓爾瑪梭磨土婦耳曩昔追從  
噶克卓克采兩土司之二心而歸於正行滕干



天子里躬率弱息牽呼牟之牲儋釣藤之醞儲糗裹  
衆漁精以送國效矣卓爾誰對烈土誠在莫替後  
王旅及身膺賢順之褒厥子曳翠翎之彩晉宣慰之  
聖二右職頒號紙而更新匹婦之智一言之利以燕  
翼子固其土疆而免三雜谷番人於塗炭識時  
務者豈必俊傑哉彼金川二酋服其土職輯睦  
鄰封無作匪慝子孫繼及雖百世可也何陰螳

方逞其斧芒技鼠已傾其憑社故曰君猶天也  
天可逃乎今二凶既定丹徼塵清井絡以外鱗  
集仰流慮皆懷音景化不敢正視乎軒轅之臺  
然夷情易惑服教貴常警覺提撕俾永喻乎患  
廸從逆之義殲狁不煩六月之師有苗弗待七  
旬之格我

國家實嘉慶之亦番夷永世無窮之福也

臣不揣

檇昧謹擬九姓土司箴四首以示風諭隨廷臣  
之末上陳

黼宇臣不勝惶悚抃慶之至其箴曰

芒芒禹服井鬼之分蠻夷酋長環我景員厥姓  
有九具惟

帝臣亦紆其綬各子其民無貳爾心洽比其鄰毋或  
祝詛自作妖孽毋或攘竅肆其饗養貪必盡失



其壞殘必覆及其宗惟恭惟順誠與

帝通勿謂汝遠

顏威咫尺師如疾霆而負汝阻僻倣擾者殃如僧格  
桑比逆者族如索諾木祇祇畏畏供職不疑及  
爾雲初廸訓有彝匡人執規用告土司

男位乎外女修帷薄牝也司晨井沸及幕曾是  
上疆而婦言是若縣柳之漿潔爾新醪蘭干之

紵勤爾夜績亦有桶裙完其要襪金釵斂鼓式  
燕夷懌毋造陰謀而干雲臺之議毋矜長舌而  
背黃龍之誓汝有長舌職厲之階皐麀夫壻覃  
及童孩朝頓戟於枳落暮伏鑕於菑街女也與  
戎鑿於阿扣曰青曰蒼車繼以覆

帝命不愆休汝休咎汝咎擇人司準用告土婦

尚夸有長佐者頭人攸司獻替比於家臣亦紀

亦綱如指臂衛厥身日告時事汝職駿奔臣妾  
逋逃汝職警巡輔爾精夫四封慎守景我

皇風誕承

恩厚汝弗肆虐於人人孰敢汝取式撫裔夷孔安孔  
皐皐則不匱毋爲利誘安則有常毋爲姦嗾罔  
比周以構罔罔行謀以犯揶阻兵安忍惟戎之  
首九首九山卒戮相柳戒之戒之恪共爾服環



人察慝用告土目

蠖蠖蠕蠕亦蠢亦靈生民惟何蠻落流形枝峯  
蔓壑棲汲相仍惟

帝德廣運欲並生生言食以毛爾稞則青言授以衣  
爾錦則頽爾嫁爾娶夷禮是徵樂我

洪幬涵淹卵育偕偕黎獻厥心恭肅毋走壙好狠毋  
嘯聚角觸杜獲斂罪游於輯睦越畔而狂佻身

飛鏃怙惡弗悛鬪蛾赴燭胡不恤汝躬而保汝

族順

帝之則無曰冥頑候人司疆用告百蠻

人察用名士曰

擬設勸諭亦在亦不在民惟何

變堅決

帝德成道欲與生言食以毛爾

帝之即飛曰實廣利人同臨民治百變我

激離海界有竹竹來無厥心恭

派險古惡集劍國地快歐民不



平定兩金川文

謹序

內

閣

中

書

臣

英

俊

臣

伏讀漢臣司馬相如封禪文班固典引竊壯

其辭采而詭稱符命尠禪實用以是少之及讀

唐臣韓愈柳宗元所為元和聖德詩平淮西雅

鋪張揚厲瑋哉厥辭憲宗中治之世淮蔡密爾

之區武功小立弗隆大道而詞臣斧藻德業旬

鏗事功焜耀喬皇侈然欲凌三而四躋五以六  
何其誣也實不足則競於文道不充則飾於貌  
理弗爽歟欽惟

皇帝陛下臨御六合道契鴻軒紹天闡繹握元符以  
撫運執泰柄而中處旁魄洪衍騰華照寓巍乎  
赫乎古未若已惟茲金川之捷蠻夷酋長凡有  
血氣聞而咸驚曰其罔或不龔其疇敢不靖而

一時鋪敘功德或謂削幽阻殲兇渠開置設鎮  
勳卓圖紀說誕而惑罔測

聖矩夫跳則誅歛則赦恢度也申誓約許濯磨鴻畧  
也遲之久而征遲之又久而後進重兵也事定  
不居功成不伐昭德也惟

一人統壹聖真稽謀定策天下晏然不見兵革而煙  
銷日清休有成烈西南諸酋安集保聚旣畏而



懷銜結世世則是役也爲耀武歟拓邊歟抑否  
歟彼漢廷稱瑞唐世頌功虛而爲盈得少爲足  
益見其陋矣臣竊不自揆敢述詩書之所述推  
見

聖人勒崇垂鴻罔不契乎拊本引綱之旨撰爲平定  
兩金川文一首雖文辭不足希作者亦庶幾存  
其實云耳其詞曰

昊天無言於穆清寧迴泊沿乎四游晃朗耀乎三精  
下俯亦曰蒼蒼物雜撰而自以爲名角距牴牾  
猛噬驍騰陰敲陽煦亭毒流形智慧蘖欺血氣  
牙爭此林林總總皇穹不能形理求肖厥德者  
爰集於

大清

列聖傳序超軼紀載麗德鴻庸彪海炳岱

皇帝御宇重華繼代滋液滲漉靡有內外譬如依被  
大曦魄莫測其光景邈處翕闔廼忘其履戴者矣  
若夫天有機槍地有豺虎腥臭之所聚屯山川  
之所掩阻則度外置之封以丸土已而乃非人  
倫而衣冠混百獸而言語爭蝸舍以噬鄰駭麋  
衣而吠主則羊鞭後至馬戮驚羣

皇威燁赫電掣霆奔撻伐所加雖槁葉之隕颺風輕



羽之迎烈焰無以方其迅疾也前者拔達靖葱  
嶺傾準噶犁掃回部款誠窮磧萬里邊烽不驚  
鄂爾淖爾隰阜旣牧天山南北蕃落以平斯則  
燕然勒石戶庭之闕耳狼居稱封藩籬之志耳  
縱誅斬草昧剗鑿鴻濛指崑崙以爲家環星源  
以爲官鳥有若是之浩兮蕩兮泱泱弗可形容  
者哉金川小醜負險恃固部邇冉駝疊通大渡

域塹所畫天地之界自秦闢蠶叢漢通邛笮未  
遑條其山川中其肯會及乎沐浴

大化則羈之絡之參之擾之信誓旦旦弗觸弗背矣  
旣而自作不靖鄰封肆啓櫪馬爭踈詭銜竊轡  
皇武旣張委命請吏許渝瘕而濯垢未禽獮而草薶  
是乃

神武不殺豈直三驅之失前禽兩階之徵干羽而已

夫獮狙冠服裂之安也螭蛆芻豢哇之甘也故  
促浸搆戮始於革布什咱分背相踉終與儻拉  
交頸相靡其間明正木坪之倫與之衡扼丹巴  
沃雜之屬爲之介倪於是陶誕突盜闖扼鷲曼  
睢盱相視譎張爲幻螿蝮螿豨殺人而嬉目熒  
四鄰氣吞九司黠者煽於毒燄弱者肉於刀機  
於是



皇帝乃命將選鋒整旅詰奸金鼓所震摧礪裂巖收

明正下資哩復革布氣斯震矣據美諾克木達

威斯宜矣擒澤旺走僧格桑力斯舉矣然而梟

酋索諾木猶敢以褫魄之餘响沫窮竄之驚魂

肱支僂拉之賊目熒惑美諾之降徒將欲返榆

燄於枯葭當椎輪以螳臂非鬼非人如羹如沸

既媾既婚若兄若弟皆茲蠢哉貫盈於自大而

詞託於同病心險乎山川而朋黨乎梟獍雖域  
肆其奸而不知天已訖其命矣

皇帝遂詔定西將軍阿桂出南路移師進攻嫺整  
藻精練罷熊氣抗崇山聲摩層穹健銳火器諸  
營淬其鋒吉林索倫諸軍礪其鏑三秦三楚諸  
鎮枕其鎧滇南黔中諸隊襄其鉞運以

神謨揮以龍韜洪决崑岡織劈秋毫九地潛攻九天

招搖赫赫烈烈洶洶加旭曾不旬日而賊空其  
巢於是谷噶批馬尼割羅博砮喇穆析康薩脊  
解木思尻劈支斷溯普胸剗默格昆色胸而用

燔茹寨腴而可食菑則髡大海剗莫不股判脍

分脂剔骸折賊巢勒圍旣而覆滅獸困而守險  
鯨奔而沸波衛舍齊與雍中意負嶠而誰何地

羅天畢水斷陸絕烟騰霧腥木灼草赤天地之



所震眩精靈之所駭懾幽嚇魑魅明拉崖壁而  
後性戒自戕籲逃伏躡跪捧印而鞠跽猥械脰  
而關膝懿五稔之役萬里之師百戰之烈逮茲  
而始卽天風飄颻送旋旆也猿鵠吟嘯和凱饒  
也左篳右壺勞

皇旅也巴歌渝謳揚樂愷也覩斯烈也所謂鴻鑠龐  
隆不可殫之顯庸矣且夫摧危礪伐叢奔非如

列單于磔屬國之游牧而更番人懸革士策馬  
非如驅橐駝燒煊蠡之臥戈而據鞍用力甚勤  
集勲若斯唐哉皇哉侯其禕而然而

皇上抑乎虔鞏深思無窮

兩陵申告則曰是惟

列祖垂馨烈焉羣臣歌頌鴻懿則曰

聖母篤慈祐焉青氣上屬榮光升邱則曰

蒼帝報瑄薌焉奠於

素王在泮樂只則曰好謀必克符

聖契焉虔劉不庭嘉勞勤恁表厥懿綱是用錫之

殊等焉敷宣景耀答

麻垂光是用鏤瓊冊崇

徽稱焉方是時也草木鳥獸熹歡懌悅嶽靈瀆神昭應

妥帖臣備員省闈望見



皇極經世一  
皇上穆穆之光退而聆樂章於太常猗歟休哉洵

大清之融祉

聖皇之恢綱也雷電竟天而天弗庸岱嶽枕地而地

弗功大矣至矣實矣高矣

聖皇之恢綱也雷電竟天而天弗庸岱嶽枕地而地

弗功大矣至矣實矣高矣

聖皇之恢綱也雷電竟天而天弗庸岱嶽枕地而地